

## REGIONAL NEWS

HEADLINES:-

1. School Education Minister Dr. Vanlalhlana'n Mizoramin ziaik leh chhiara hma a sawn zel theih na'n thawhhona a pawimawh a ni, a ti.
2. Ningani khian Joint Civil Society of Mizoram (JCM) huaihawtin Forest Conservation Amendment Act, 2023 dodalna lantir a ni dawn.
3. Kum 2024-2025 chung khan zinmi Mizoram rawn tlawhtu an pung nasa hle.
4. Ruahsur nasa vanga tuilian leh leimin nasa tak thlenna, Punjab, Jammu & Kashmir leh Himachal Pradesh-ah chhawmdawl hna, ngawrh taka thawh chhoh zel a ni.

&lt;&gt;&lt;&gt;&lt;&gt;

LITERACY

School Education Minister Dr. Vanlalhlana chuan Mizoramin ziaik leh chhiara hma a sawn zel theih na'n sorkar mai bakah kohhran, tlawmngai pawl hrang hrangte leh mipuite thawhhona a pawimawh tih a sawi.

Naktuk Khawvel ziaik leh chhiar Ni, International Literacy Day puala waviin tlaia Akashvani Aizawla a thusawiah he thu hi sawiin Minister chuan he niin a tum ber chu ziaik leh chhiar thiam pawimawhzia leh a tulzia inhriat thar tir ani a ti a, Ziaik leh chhiar thiam chu mihring dikna chanvo a nih thu sawiin International Literacy Day chu kum 1976 atangin kum tin Mizoramah pawh hman thin a nih thu a sawi a ni.

Minister chuan sorkarin ziaik leh chhiar thiam an lo pun zelna tura hma a laknaah a enkawltu sorkar department bakah kohhranho leh an hnuiaia missionary te, tlawmngai pawl hrang hrang leh mipuiten an thawhhlawk zia a sawi a. Zirtirtu leh zirlaite inpekna thukzia an hriat reng thu leh ropui a tih thu a sawi a ni.

Minister chuan New India Literacy Programme (NILP), Understanding Lifelong Learning for all in Society (ULLAS) tia sawi tak, kum 2022 atanga kum 2027 chhunga mitinin ziaik leh chhiar an lo thiam nana sorkar laipui hmalakna chu kum 2022 atangin Mizoramah pawh kalpui tan a nih thu a sawi a. Mizoram dinhmun pawhin hma sawn zelin Mizoram chu sorkar laipui pawhin India ram puma ziaik leh chhiar thiam kim hmasa bera a pawm tak thu leh mipui nawlpui hriat theih turin kumin May ni 20 khan Chief Minister in a puanzar thu a sawi a. Kumin thupui digital khawvela ziaik leh chhiar thiam tura hmalak, Promoting Literacy in the Digital Era tih hman mekah pawh Mizoram chuan digital khawvel mitthla tel reng chungga programme a duan thiam chhoh zel a pawimawh thu a sawi bawk.

&lt;&gt;&lt;&gt;&lt;&gt;

CAG - HEALTH

Comptroller and Auditor General of India (CAG) report hnunung ber chuan health & family welfare department enkawl chungchangah Mizoram sorkar chu na taka sawiselin hriselna lam atana pawisa dah tlem lutuk, hnathawk indaih lohna nasa leh Covid-19 hri len lai a mipui hriselna lam ngaihthahah a puh.

CAG report-in a tarlan danin chuan National Health Policy, 2017 chuan kum 2020 atang chuan hriselna lama sum sen tur ruahman hi budget pum atanga za zela 8 aia tama tihpun chhoh tur a ni a. Mahse, kum 2017-2022

inkara Mizoram a hriselna lam atana budget ruahmanchu za zela 8 aia hnyiam a ni a, za zela 4 point 8 leh 6 point 60 bial inkar chauh a ni . Kum 2021-22 ah budget pumpui atanga za zela 3 point 95 chauh hriselna lam atana hman tura sum ruahman a ni a, kum 2017-18 ah za zela 4 point 94 chauh ruahman a ni bawk. District hospital zingah Aizawl a district hospital-te tih loh chu mipui mamawh ang tur nei kim an awm lova, a bikin Saitual, Hnahthial leh Khawzawl District Hospital te chu a nih tur anga thuam an la ni lo hrim hrim a, District Hospital-ah te hian specialist doctor indaih lohna chu za zela 39 leh 45 inkar a ni a, general duty doctor indaih lohna phe chu za zela 72 leh 75 inkar a ni a. Nurse indaih lohna hi za zela 43 leh 46 inkar niin paramedic indaih lohna chu za zela 45 leh 50 inkar a ni.

Kum 2021-22 khan naupang pneumonia vei enkawlna hi Saitual district hospital tih lohah chuan a awm vek a, intensive care unit (ICU) erawh chu Aizawl district hospital leh Champhai district hospital-ah te chauh a awm a ni. Covid-19 hri len lai khan hriselna lama hmasawna ruangam dinte chu tangkai taka hman a awm meuh lova. Covid-19 hri kai leh kai loh endikna RT-PCR khawl bun a khaw tlai a, oxygen siamchhuahna khawl bun pawh tikhawtlai a ni. Kum 2021 April thla chaw hnu lama bun fel tura tih oxygen siamchhuahna khawl 7 zinga 2 chauh kum 2023 April thla khan bun a la nih thu auditor-te chuan an hmu chhuak a. Thla 11 leh thla 25 inkar chhung zet tikhawtlai a ni tihna ani.

<><><>

#### ICM STIR

Joint Civil Society of Mizoram (JCM) huaihawtin Mizoram assembly-a Forest Conservation Amendment Act, 2023 (FCAA, 2023) chungchanga resolution pawm a nih duh lohna lantir a ni dawn.

JCM hruaitute sawi danin tunkar Ningani (September ni 11) khian Aizawl Vanapa Hall kawtah Assembly-in FCAA 2023 chungchanga official resolution pawma he dan siamthatna hi Mizorama hman ve tura a nemnghet duh loh entirna'n punkhawm an huaihawt dawn a. He mi chungchangah hian Inrinni khan JCM buatsaihin Forest Conservation Amendment Act, 2023 (FCAA, 2023) Mizoram Legislative Assembly August ni 27-a thukhawm in a nih ang anga Mizorama hman theih tura an lo pawm (adopt) chu tha an tih loh thu leh pawmpui theih ni lova an hriat avangin , hemi chungchanga inrawnkhawmna a buatsaih a. Hetah hian heng NGO, Political Party leh Pawl hrang hrang an sawm zingah Central YMA, MHIP Hqrs, MPCC, MNF, PC, Mizoram Transformation Movement (MTM), CESJ, Mizoram First, CATAJ, ZORO, Mizoram Environment NGO te an tel a,hetah hian Mizoram assembly-in FCAA 2023 a lo pawm tak chu ram leh hnam, thlahte leh chhuan lokal zel turte tana thil him lo, tha lo leh paw tak, chhiat hlenna hial thlen thei ni a an hriat thu an sawi a ni.

He inkhawmnaah hian Thutlukna siamin chuan FCAA 2023 hi a nih ang ang a pawm hi tha an tih loh thu leh Mizoram Legislative Assembly Session August ni 27, thukhawm in a lo pawmchu sut leh ni sela, a tul angin Assembly Special Session pawh ko ngei rawh se, an ti a. He thil hi assembly vekin a sut leh theihna turin hmalakna tur hrang hrang duangin Mipui punkhawm, Kawng zawh leh a tul angin Bandh emaw huaihawt ni se an ti a. Chu bakah Online leh Off-line Signature Campaign buatsaih an rel a. A tul anga Mizo mipuite hrilhfiyah a Mizoram khaw hrang hranga vantlang inkhawm huaihawt an rel a. Kalkhawm pawl hrang hrangte

chuan an thutluknate hi a hlawhtlin ngei theihna turin chak taka hmalak zel a nih theih na'n JCM hmalakna an thlawp tlat thu an puang bawk a ni.

<><><>

#### BAWNGKAWN SHOOTING

Thla hlui ni 29 zana Aizawl, Bawngkawna silai mu tuar Lalhriatrenga Siakeng chu a tha chho viaua hriat a nih laiin tukin khan a thawk a hah avangin ICU-ah dah luh a ni.

Zotlang YMA President Dr. Lalthansanga'n chuan Akashvani Aizawl a hrilh danin , Lalhriatrenga Siakeng chu a tha chho tawh viaua an hriat laiin, tukin mai khan a thawk a rawn hah thut avangin ICU-ah dah luh a nih thu leh ventilator te pawh an hman tir thu a sawi a. Lalhriatrenga Siakeng kaptu Rochhingpuia chu tun thla ni 12-ah court hmaah a inlan nia an hriat thu leh hemi chungchangah hian tunhnaia Bawngkawn branch YMA nena thuchhuah intawm an siam chu an tanna a nih reng thu a sawi a ni.

Puan tawh angin Rochhingpuia hian Zotlang veng mi Lalhriatrenga Siakeng chu Bawngkawn vengah thla hmasa ni 29 zan khan an intihbuainaah silaiin a kap a. Rochhingpuia hi man nghal niin Siakeng chu damdawiinah enkawl a ni. Ningani kalta khan Bawngkawn leh Zotlang branch YMA te chuan thuchhuah intawm siamin Rochhingpuia chu a thubuai ngaihtuah a nih chungin bail hmanga jail a chhuahsan an remtih loh thu an sawi a. An chhungkuua Burma atanga Champhaia lo pem, ruihhlo tawlhruk avanga Champhaia an awmna veng pawhin pem lehkha pe duh lova an hnawh chhuah an nih thu an sawi a. Ruihhlo tawlh ruk thin thubuai atang hian engtia zalen ta mai nge a nih an hriatthiam loh thu leh hetiang a rawn zalen leh mai a nih chuan a chungah engpawh thleng se mawh an phurh dawn loh thu an sawi a ni.

<><><>

#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### TOURISTS

Tangka kum kal ta (2024-2025) chhung khan zinmi (tourist) nuai 5, sing 2, sang 4 leh 784-in Mizoram an rawn tlawh a, an zinga mi nuai 5, sing 1, sang 8 leh 873 te chu ramchung mi an ni a, mi 5,911 te chu ramdangmi an ni.

Tourism department hotute hnen atanga thu dawn danin 2023-2024 tangka kum nena khaikhinin tangka kum kalta (2024-2025) chhunga Mizoram rawn tlawhtu zinmite hi za zela 139 point 50 zetin an pung a ni. Tangka kum 5 (kum (2020-21 leh 2024-25 inkar) chhung khan Mizoram hi zinmi nuai 11, sing 1, sang 9 leh 86-in an tlawh a. An zinga mi 13,953 te chu India ram pawn atanga Mizoram rawn tlawhtute an ni a. Tourism department hotute sawi dan chuan kum 2019-2020 nena khaikhin chuan Covid hri a len tan tak kum 2020-2021 khan Mizorama zinmi lo lut an tlem hle a, za zela 87 point 28 in a tlahniam a. Amaherawh chu kum 2021-22 chhung khan za zela 544 point 89 zetin a invawrh sang chho leh a ni.

Hetianga Mizoram rawn tlawhtu zinmi an pun mek lai, leh ramchung a cheng tam takin an tlawh mek lai hian ramdang atanga rawn tlawhtu erawh an tlem chho telh telh dawn ni a rinna lian tak a awm a. A chhan

chu ramdangmite'n Mizoram leh Myanmar ramri depa awm state, Manipur leh Nagaland-a an duh thala an rawn tlawh phalsakna kum 14 zet kalpui tawh chu nikum December thla atanga khuahkhirh thar leh a nih tak vang a ni a. Ramdang, a bikin United States, United Kingdom leh Israel ram atanga Mizorama lo zin tum tam tak chu thawn let an ni.

<><><>

#### RELIEF OPERATIONS

Ruahsur nasa vanga tuilian leh leimin nasa tak thlenna, Punjab, Jammu & Kashmir leh Himachal Pradesh-ah chhawmdawl hna, ngawrh taka thawh chhoh zel a ni a, Indian Air Force pawhin chhiatna nasa tak thlenna, Jammu & Kashmir leh Himachal Pradesh-ah chhanchhuah leh chhawmdawl hna an thawk a ni. IAF Western Air Command sawi danin, Air Force helicopter 4 leh thawktu 35-ten Punjab, Himachal Pradesh leh Jammu & Kashmir-ah chhun zan zawmin chhawmdawl hna an thawk a, Bharmor-Chamba sector atangin mi 541, hmun himah thiar chhuakin Kullu leh Kishtwar sector-ah chhawmdawl na thil chi hrang hrang Kg sing 1 chuang an thlak tawh bawk a ni.

Hetih lai hian Punjab-ah tuilian a kam tan a, he state-a ruahsur nasa vanga chhiatna hrang hrang thlengah mi 46 an thi a, tuilian hian thingtlang khua sang 2 chuang a tibuai a ni.

Jammu & Kashmir-ah erawh chuan tun kar chhung ruah a la sur thei tih Met Dept chuan a sawi a, Himachal Pradesh-ah erawh chuan khaw awmdan ziaawm chho tur beisei a ni. Himachal Pradesh-ah hian chhiatna a thleng nasa hle a, hmun 135-ah lei a min bakah sabereka khuangkaih tum 95 a thleng a, mi 366 an thih bakah midang 41 chin hriat lohvin an la awm bawk a ni.

<><><>